

632
B22205
C36a7
2

四书五经·领导智慧

左 传

(下)



A1055808

中国华侨出版社

襄公十三年

【原文】

十有三年春，公至自晋。夏，取邾^①。秋，九月庚辰，楚子审卒^②。冬，城防。

【注释】

①邾：小国也。任城亢父县有邾亭。传例曰：“书取，言易也。” ②楚子审：共王也。

【原文】

十三年春，公至自晋，孟献子书劳于庙，礼也^①。

【注释】

①书勋劳于策也。

【原文】

夏，邾乱，分为三^①。师救邾，遂取之^②。凡书“取”，言易也^③。用大师焉曰“灭”^④。弗地曰“入”^⑤。

【注释】

①国分为三部，志力各异。 ②师：鲁师也。经不称师，不满二千五百人。传通言之。 ③取：不用师徒，及用师徒而

不劳，虽国亦曰取。④灭：敌不距战，斩获俘馘，用力难

重，虽邑亦曰灭。⑤弗地：谓胜其国邑，不有其地。

【原文】

荀莹、士魴卒。晋侯蒐于绵上以治兵^①，使士匄将中军，辞曰：“伯游长^②。昔臣习于知伯，是以佐之，非能贤也^③。请从伯游。”荀偃将中军^④，士匄佐之^⑤。使韩起将上军，辞以赵武。又使栾黶^⑥，辞曰：“臣不如韩起。韩起愿上赵武，君其听之！”使赵武将上军^⑦，韩起佐之^⑧。栾黶将下军，魏绛佐之^⑨。新军无帅^⑩，晋侯难其人，使其什吏，率其卒乘官属，以从于下军，礼也^⑪。晋国之民，是以大和，诸侯遂睦。

君子曰：“让，礼之主也。范宣子让，其下皆让。栾黶为汰，弗敢违也。晋国以平，数世赖之。刑善也夫^⑫！一人刑善，百姓休和，可不务乎？《书》曰：‘一人有庆，兆民赖之，其宁惟永^⑬。’其是之谓乎？周之兴也，其《诗》曰：‘仪刑文王，万邦作孚^⑭。’言刑善也。及其衰也，其《诗》曰：‘大夫不均，我从事独贤^⑮。’言不让也。世之治也，君子尚能而让其下^⑯，小人农力以事其上，是以上下有礼，而谗慝黜远，由不争也。谓之懿德。及其乱也，君子称其功以加小人^⑰，小人伐其技以冯君子^⑱，是以上下无礼，乱虐并生，由争善也^⑲。谓之昏德。国家之敝，恒必由之^⑳。

【注释】

①为将命军帅也。必搜而命之，所以与众共。

②伯游：

荀偃。③七年，韩厥老，知罃代将中军，士匄佐之。匄今将让，故谓尔时之举，不以己贤。事见九年。④代荀罃。⑤位如故。⑥以武位卑，故不听，更命廕。⑦武自新军超四等，代荀偃。⑧位如故。⑨廕亦如故。絳自新军佐超一等，代士魋。⑩将佐皆迁。⑪得慎举之礼。⑫刑：法也。⑬《书》：《周书·吕刑》也。一人：天子也。宁：安也。永：长也。义取上有好善之庆，则下赖其福。⑭言文王善用法，故能为万国所信。孚，信也。⑮刺幽王役使不均，故从事者怨恨，称己之劳以为独贤，无让心。⑯能者在下位，则贵尚而让之。⑰加：陵也。君子：在位者。⑱冯：亦陵也。自称其能为伐。⑲争善：争自善也。⑳传言晋之所以兴。

【原文】

楚子疾，告大夫曰：“不谷不德，少主社稷，生十年而丧先君，未及习师保之教训，而应受多福^①。是以不德，而亡师于鄢^②，以辱社稷，为大夫忧，其弘多矣^③。若以大夫之灵，获保首领以殁于地，唯是春秋窀穸之事^④，所以从先君于祔庙者^⑤，请为‘灵’若‘厉’^⑥。大夫择焉！”莫对。及五命乃许。

秋，楚共王卒。子囊谋谥。大夫曰：“君有命矣。”子囊曰：“君命以共，若之何毁之？赫赫楚国，而君临之，抚有蛮夷，奄征南海，以属诸夏，而知其过，可不谓共乎？谓谥之‘共’。”大夫从之^⑦。

【注释】

①多福：谓为君。②鄢：在城十六年。③弘：大

也。④窀：厚也。窆：夜也。厚夜：犹长夜。春秋，谓祭祀。长夜，谓葬埋。⑤从先君代为祔庙。⑥欲受怨讟以归先君也。乱而不损曰“灵”。戮杀不辜曰“厉”。⑦传言子囊之善。

【原文】

吴侵楚，养由基奔命，子庚以师继之^①。养叔曰：“吴乘我丧，谓我不能师也^②，必易我而不戒^③。子为三覆以待我^④，我请诱之。”子庚从之。战于庸浦^⑤，大败吴师，获公子党。

君子以吴为不吊^⑥。《诗》曰：“不吊昊天，乱靡有定^⑦。”

【注释】

①子庚：楚司马。②养叔：养由基也。③戒：备也。④覆：伏兵。⑤庸浦：楚地。⑥不用天道相吊恤。⑦言不为昊天所恤，则致罪也。为明年会向传。

【原文】

冬，城防，书事，时也^①。于是将早城，臧武仲请俟毕农事，礼也。

【注释】

①土功虽有常节，通以事閒为时。

【原文】

郑良霄、大宰石旻犹在楚^①。石旻言于子囊曰：“先王卜征五年^②，而岁习其祥，祥习则行^③，不习则增修德而改卜^④。今楚实不竞，行人何罪^⑤？止郑一卿，以除其偏^⑥，使睦而疾楚，以固于晋，焉用之^⑦？使归而废其使^⑧，怨其君以疾其大夫，而相牵引也，不犹愈乎？”楚人归之。

【注释】

①十一年，楚人执之至今。 ②先征五年而卜吉凶也。征：谓巡守征行。 ③五年五卜，皆同吉，乃巡守。 ④不习：谓卜不吉。 ⑤不竞：不能修德与晋竞。 ⑥一卿：谓良霄。 ⑦位不偏，则大臣睦；怨疾楚，则事晋固。 ⑧行而见执于楚，郑又遂坚事晋，是郑废本见使之意。

襄公十四年

【原文】

十有四年春，王正月，季孙宿、叔老会晋士臼、齐人、宋人、卫人、郑公孙盂、曹人、莒人、邾人、滕人、薛人、杞人、小邾人会吴于向^①。二月乙未朔，日有食之。夏四月，叔孙豹会晋荀偃、齐人、宋人、卫北营括、郑公孙盂、曹人、莒人、邾人、滕人、薛人、杞人、小

邾人伐秦^②。己未，卫侯出奔齐^③。莒人侵我东鄙^④。秋，楚公子贞帅师伐吴。冬，季孙宿会晋士匄、宋华阅、卫孙林父、郑公孙蠆、莒人、邾人于戚。

【注释】

①叔老：声伯子也。鲁使二卿会晋，敬事霸国。晋自是轻鲁币，而益敬其使，故叔老虽介，亦列于会也。齐崔杼、宋华阅、卫北宫括在会情慢不摄，故贬称人，盖欲以督率诸侯，奖成霸功也。吴来在向，诸侯会之，故曰会吴。向：郑地。 ②齐、宋大夫不书，义与向同。 ③诸侯之策书孙宁逐卫侯。春秋以其自取奔亡之祸，故诸侯失国者，皆不书逐君之贼也。不书名，从告。 ④元传。报入郛。

【原文】

十四年春，吴告败于晋^①。会于向，为吴谋楚故也^②。范宣子数吴之不德也，以退吴人^③。执莒公子务娄^④，以其通楚使也^⑤。

将执戎子驹支^⑥。范宣子亲数诸朝^⑦，曰：“来！姜戎氏，昔秦人迫逐乃祖吾离于瓜州^⑧，乃祖吾离被苫盖^⑨，蒙荆棘，以来归我先君^⑩。我先君惠公有不腆之田^⑪，与女剖分而食之^⑫。今诸侯之事我寡君不如昔者，盖言语漏泄，则职女之由^⑬。诘朝之事，尔无与焉^⑭！与将执女！”

对曰：“昔秦人负恃其众，贪于土地，逐我诸戎。惠公蠲其大德^⑮，谓我诸戎是四岳之裔胄也^⑯，毋是翦

弃^①。赐我南鄙之田，狐狸所居，豺狼所嗥。我诸戎除翦其荆棘，驱其狐狸豺狼，以为先君不侵不叛之臣，至于今不貳^②。昔文公与秦伐郑，秦人窃与郑盟而舍戍焉^③，于是乎有殽之师^④。晋御其上，戎亢其下^⑤，秦师不复，我诸戎实然。譬如捕鹿，晋人角之，诸戎持之^⑥，与晋踣之^⑦，戎何以不免？自是以来，晋之百役，与我诸戎相继于时^⑧，以从执政，犹殽志也^⑨，岂敢离遏？今官之师旅，无乃实有所阙，以携诸侯，而罪我诸戎！我诸戎饮食衣服不与华同，贄币不通，言语不达，何恶之能为？不与于会，亦无薈焉^⑩！”赋《青蝇》而退^⑪。宣子辞焉^⑫，使即事于会，成恺悌也^⑬。

于是，子叔齐子为季武子介以会，自是晋人轻鲁币，而益敬其使^⑭。

【注释】

- ①前年为楚所败。 ②谋为吴伐楚。 ③吴伐楚丧，故以为不德。数而遣之，卒不为伐楚。 ④在会不书，非卿。
⑤莒貳于楚，故比年伐鲁。 ⑥驹支：戎子名。 ⑦行之所在，亦设朝位。 ⑧四岳之后皆姜姓，又别为允姓。瓜州地在今炖煌。 ⑨盖：苦之别名。 ⑩蒙：冒也。 ⑪腴：厚也。 ⑫剖：中分为剖。 ⑬职：主也。 ⑭诘朝：明旦。不使复得与会事。 ⑮薈：明也。 ⑯四岳：尧时方伯，姜姓也。裔：远也。曹：后也。 ⑰翦：削也。 ⑱不内侵，亦不外叛。 ⑲在僖公三十年。 ⑳在僖公三十三年。 ㉑亢：犹当也。 ㉒持之：持其足也。 ㉓踣：僵也。 ㉔言给晋役不旷时。 ㉕意常如殽，无中二也。

②瞽：闷也。 ③青蝇：取其“悛悌君子，无信谗言”。

④辞：谢。 ⑤成悛悌：不信谗也。不书者，戒为晋属，不得特达。 ⑥齐子：叔老字也。言晋敬鲁使，经所以并书二卿。

【原文】

吴子诸樊既除丧^①，将立季札^②。季札辞曰：“曹宣公之卒也，诸侯与曹人不义曹君^③，将立子臧。子臧去之，遂弗为也，以成曹君。君子曰：‘能守节。’君，义嗣也^④。谁敢奸君？有国，非吾节也。札虽不才，愿附于子臧，以无失节。”固立之。弃其室而耕，乃舍之^⑤。

【注释】

①诸樊：吴子乘之长子也。乘卒至此春十七月，既葬而除丧。 ②札：诸樊少弟。 ③曹君：公子负刍也，杀太子而自立。事在成公十三年。 ④诸樊：适子，故曰义嗣。 ⑤传言季札之让，且明吴兄弟相传。

【原文】

夏，诸侯之大夫从晋侯伐秦，以报栳之役也^①。晋侯待于竟，使六卿帅诸侯之师以进^②。及泾，不济^③。叔向见叔孙穆子，穆子赋《匏有苦叶》^④。叔向退而具舟，鲁人、莒人先济。郑子侨见卫北宫懿子曰：“与人而不固，取恶莫甚焉！若社稷何？”懿子说。二人见诸侯之师而劝之济，济泾而次^⑤。秦人毒泾上流，师人多死^⑥。郑司马子侨帅郑师以进，师皆从之，至于棧林^⑦，不获成

焉^⑧。荀偃令曰：“鸡鸣而驾，塞井夷灶^⑨，唯余马首是瞻^⑩！”栾黶曰：“晋国之命，未是有也。余马首欲东。”乃归^⑪。下军从之。左史谓魏庄子曰：“不待中行伯乎^⑫？”庄子曰：“夫子命从帅^⑬。栾伯，吾师也，吾将从之。从帅，所以待夫子也^⑭。”伯游曰：“吾令实过，悔之何及，多遗秦禽^⑮。”乃命大还。晋人谓之迁延之役^⑯。

栾黶曰：“此役也，报栳之败也。役又无功，晋之耻也。吾有二位于戎路^⑰，敢不耻乎？”与士鞅驰秦师，死焉。士鞅反^⑱，栾黶谓士句曰：“余弟不欲往，而子召之。余弟死，而子来，是而子杀余之弟也。弗逐，余亦将杀之。”士鞅奔秦^⑲。

于是，齐崔杼、宋华阅、仲江会伐秦，不书，情也^⑳。向之会亦如之。卫北宫括不书于向^㉑，书于伐秦，摄也^㉒。

【注释】

①栳役在十一年。 ②言经所以不称晋侯。 ③不济：诸侯之师不肯渡也。泾水出安定朝那县，至京兆高陆县入渭。

④《诗经·邶风》也。义取于“深则厉，浅则揭”。言己志在于必济。 ⑤传言北宫拓所以书于伐秦。 ⑥饮毒水故。

⑦械林：秦地。 ⑧秦不服。 ⑨示不反。 ⑩言进退从己。 ⑪驪恶偃自专，故弃之归。 ⑫中行伯：荀偃也。庄子：魏绛也。左史：晋大夫。 ⑬夫子：谓荀偃。 ⑭以从命为待也。栾黶：下军帅，庄子为佐，故曰吾师。 ⑮军帅不和，恐秦所禽获。 ⑯迁延：却退。 ⑰栾黶：栾黶弟也。二位，谓驪将下军，黶为戎右。 ⑱鞅：士句子。 ⑲栾驪

汰侈，诬逐士鞅也。而：女也。①临事情慢不修也。仲江：宋公孙师之子。②亦情。③摄：能自摄整，从郑子侨俱济泾。

【原文】

秦伯问于士鞅曰：“晋大夫其谁先亡？”对曰：“其栾氏乎！”秦伯曰：“以其汰乎？”对曰：“然。栾黶汰虐已甚，犹可以免。其在盈乎①！”秦伯曰：“何故？”对曰：“武子之德在民，如周人之思召公焉，爱其甘棠，况其子乎②？栾黶死，盈之善未能及人，武子所施没矣，而黶之怨实章，将于是乎在。”秦伯以为知言，为之请于晋而复之③。

【注释】

①盈：黶之子。②武子：栾书，黶之父也。召公替听讼于甘棠之下，周人思之，不害其树，而作勿伐之诗，在召南。

③为传二十一年晋灭栾氏张本。

【原文】

卫献公戒孙文子、宁惠子食①，皆服而朝②。日旰不召③，而射鸿于囿。二子从之④，不释皮冠而与之言⑤。二子怒。孙文子如戚⑥，孙蒯入使⑦。公饮之酒，使大师歌《巧言》之卒章⑧。大师辞，师曹请为之⑨。初，公有嬖妾，使师曹诲之琴⑩，师曹鞭之。公怒，鞭师曹三百。故师曹欲歌之，以怒孙子以报公。公使歌之，遂诵之⑪。

蒯惧，告文子。文子曰：“君忌我矣，弗先，必死^⑫。”

并帑于戚^⑬而入，见蒯伯玉曰：“君之暴虐，子所知也。大惧社稷之倾覆，将若之何^⑭？”对曰：“君制其国，臣敢奸之^⑮？虽奸之，庸知愈乎^⑯？”遂行，从近关出^⑰。

公使子娇、子伯、子皮与孙子盟于丘宫，孙子皆杀之^⑱。四月己未，子展奔齐^⑲。公如鄆^⑳，使子行于孙子，孙子又杀之^㉑。公出奔齐，孙氏追之，败公徒于阿泽^㉒。鄆人执之^㉓。

初，尹公佗学射于庚公差，庚公差学射于公孙丁。二子追公^㉔，公孙丁御公^㉕。子鱼曰：“射为背师，不射为戮，射为礼乎^㉖！”射两鞬而还^㉗。尹公佗曰：“子为师，我则远矣。”乃反之^㉘。公孙丁授公轡而射之，贯臂^㉙。

子鲜从公^㉚，及竟，公使祝宗告亡，且告无罪^㉛。定姜曰：“无神何告？若有，不可诬也^㉜。有罪，若何告无？舍大臣而与小臣谋，一罪也。先君有冢卿以为师保，而蔑之，二罪也^㉝。余以巾栉事先君，而暴妾使余，三罪也。告亡而已，无告无罪^㉞！”

公使厚成叔吊于卫，曰：“寡君使瘠，闻君不抚社稷，而越在他竟^㉟，若之何不吊？以同盟之故，使瘠敢私于执事^㊱曰：‘有君不吊^㊲，有臣不敏^㊳，君不赦宥，臣亦不帅职，增淫发泄，其若之何？’”卫人使大叔仪对^㊴曰：“群臣不佞，得罪于寡君。寡君不以即刑而悼弃之，以为君忧。君不忘先君之好，辱吊群臣，又重恤之^㊵。敢拜君命之辱，重拜大貺^㊶。”厚孙归，复命，语

臧武仲曰：“卫君其必归乎！有大叔仪以守^④，有母弟鲜以出，或抚其内，或营其外，能无归乎？”齐人以郕寄卫侯^⑤。及其复也，以郕粮归^⑥。

右宰谷从而逃归，卫人将杀之^⑦。辞曰：“余不说初矣^⑧，余狐裘而羔袖^⑨。”乃赦之。

卫人立公孙剡^⑩，孙林父、宁殖相之，以听命于诸侯^⑪。

卫侯在郕。臧纥如齐唁卫侯。卫侯与之言，虐。退而告其人曰：“卫侯其不得入矣！其言羹土也，亡而不变，何以复国^⑫？”子展、子鲜闻之，见臧纥，与之言，道^⑬。臧孙说，谓其人曰：“卫君必入。夫二子者，或挽之，或推之，欲无入，得乎^⑭？”

【注释】

- ①敕戒二子，欲共宴食。 ②服而朝：服朝服，待命于朝。 ③阼：晏也。 ④从之：从公于圉。 ⑤皮冠：田猎之冠也。既不释冠，又不与食。 ⑥戚：孙文子邑。 ⑦孙蒯：孙文子之子。 ⑧《巧言》：其卒章曰：“彼何人斯？居河之麋，无匪无勇，职为乱阶。”戚：卫河上邑。公欲以喻文子居河上而为乱。大师：掌乐大夫。 ⑨辞以为不可。师曹，乐人。 ⑩诲：教也。 ⑪恐孙蒯不解故。 ⑫欲先公作乱。 ⑬郕：子也。 ⑭伯玉：蓬瑗。 ⑮奸：犹犯也。

⑯言逐君更立，未知当差否？ ⑰惧难作，欲速出竟。

⑱子娇、子伯、子皮：三子，卫群公子。疑孙子，故盟之。丘官，近戚地。 ⑲子展：卫献公弟。 ⑳野：卫地。 ㉑使往请和也。子行：群公子。 ㉒阿泽：济北东阿县西南有大

泽。 ②公徒因败散还，故为公执之。 ③二子：佗与差。
 为孙氏逐公。 ④御公：为公御也。 ⑤子鱼：庚公差。
 礼，射不求中。 ⑥鞬：车辄卷者。 ⑦佗不从丁学，故言
 远。始与公差俱退，悔而独还射丁。 ⑧贯臂：贯佗臂。
 ⑨子鲜：公母弟。 ⑩告宗庙也。 ⑪诬：欺也。定姜：公
 适母。 ⑫谓不释皮冠之比。 ⑬时姜在国，故不使得告无
 罪。 ⑭越：远也。瘠：厚成叔名。 ⑮执事：卫诸大夫。
 ⑯吊：恤也。 ⑰敏：达也。 ⑱大叔仪：卫大夫。
 ⑲重恤，谓愍其不达也。 ⑳谢重恤之赐。 ㉑守：守于
 国。 ㉒邾：齐所灭邾国。 ㉓言其贪。 ㉔谷：卫大夫
 也。以其从君，故欲杀之。 ㉕言初从君，非说之，不获已
 耳。 ㉖言一身尽善，唯少有恶。喻己虽从君出，其罪不多。
 ㉗剽：穆公孙。 ㉘听盟会之命。 ㉙武仲不书，未为
 卿。 ㉚道：顺道理。 ㉛为二十六年卫侯归传。

【原文】

师归自伐秦，晋侯舍新军，礼也。成国不过半天子
 之军^①，周为六军，诸侯之大者，三军可也。

于是知朔生盈而死^②，盈生六年而武子卒，蒧袭产
 幼，皆未可立也。新军无帅，故舍之^③。

【注释】

①成国：大国。 ②朔：知蓐之长子。盈，朔弟也。盈生
 而朔死。 ③蒧：士魴子也。十三年，荀蓐、士魴卒，其子皆
 幼，未任为卿。故新军无帅，遂舍之。

【原文】

师旷侍于晋侯^①。晋侯曰：“卫人出其君，不亦甚乎？”对曰：“或者其君实甚。良君将赏善而刑淫，养民如子，盖之如天，容之如地。民奉其君，爱之如父母，仰之如日月，敬之如神明，畏之如雷霆，其可出乎？夫君，神之主而民之望也。若困民之主，匮神乏祀，百姓绝望，社稷无主，将安用之？弗去何为？天生民而立之君，使司牧之，勿使失性。有君而为之貳^②，使师保之，勿使过度。是故天子有公，诸侯有卿，卿置侧室^③，大夫有貳宗^④，士有朋友，庶人、工、商、皂、隶、牧、圉皆有亲昵，以相辅佐也。善则赏之^⑤，过则匡之^⑥，患则救之^⑦，失则革之^⑧。自王以下，各有父兄子弟，以补察其政^⑨。史为书^⑩，瞽为诗^⑪，工诵箴谏^⑫，大夫规诲^⑬，士传言^⑭，庶人谤^⑮，商旅于市^⑯，百工献艺^⑰。故《夏书》曰：‘道人以木铎徇于路^⑱。官师相规^⑲，工执艺事以谏^⑳。’正月孟春，于是乎有之，谏失常也^㉑。天之爱民甚矣。岂其使一人肆于民上^㉒，以从其淫，而弃天地之性？必不然矣^㉓。”

【注释】

- ①师旷：晋乐师子野。 ②貳：卿佐。 ③侧室：支子之官。 ④貳宗：宗子之副贰者。 ⑤赏：谓宣扬。 ⑥匡：正也。 ⑦救之：救其难也。 ⑧革：更也。 ⑨补察其政：补其愆过，察其得失。 ⑩史为书：谓大史，君举则

书。 ⑪瞽：盲者，为诗以风刺。 ⑫工：乐人也。诵箴谏之辞。 ⑬规诲：规正谏诲其君。 ⑭士卑不得径达，闻君过失，传告大夫。 ⑮庶人不与政，闻君过则诽谤。 ⑯旅：陈也。陈其货物，以示时所贵尚。 ⑰献其技艺，以喻政事。 ⑱逸书。遣人：行令之官也。木铎：木舌金铃。徇于路，求歌谣之言。 ⑲官师：大夫。自相规正。 ⑳所谓献艺。 ㉑有道人徇路之事。 ㉒肆：放也。 ㉓传言师旷能因问尽言。

【原文】

秋，楚子为庸浦之役故^①，子囊师于棠以伐吴，吴不出而还。子囊殿^②，以吴为不能而弗徼。吴人自皋舟之隘要而击之^③，楚人不能相救。吴人败之，获楚公子宜谷^④。

【注释】

- ①在前年。 ②殿：殿军后。 ③皋舟：吴险阨之道。
④传言不备不可以师。

【原文】

王使刘定公赐齐侯命^①，曰：“昔伯舅大公，右我先王，股肱周室，师保万民，世胙大师，以表东海^②。王室之不坏，繄伯舅是赖^③。今余命女环^④，兹率舅氏之典，纂乃祖考，无忝乃旧。敬之哉，无废朕命^⑤！”

【注释】

- ①将昏于齐故也。定公：刘夏。位贱，以能而使之。传称

谥，举其终。 ②胙：报也。表：显也。谓显封东海，以报大师之功。 ③繁：发声。 ④环：齐灵公名。 ⑤纂：继也。因昏而加褒显，传言王室不能命有功。

【原文】

晋侯问卫故于中行献子^①，对曰：“不如因而定之。卫有君矣^②，伐之，未可以得志而勤诸侯。史佚有言曰：‘因重而抚之^③。’仲虺有言曰^④：‘亡者侮之，乱者取之，推亡固存，国之道也。’君其定卫以待时乎^⑤！”

冬，会于威，谋定卫也^⑥。

【注释】

①问卫逐君当讨否？献子：荀偃。 ②谓剽已立。 ③重而抚之：重不可移，就抚安之。 ④仲虺：汤左相。 ⑤待其昏乱之时，乃伐之。 ⑥定位剽。

【原文】

范宣子假羽毛于齐而弗归，齐人始貳^①。

【注释】

①羽毛：析羽为旌，王者游车之所建，齐私有之，因谓之羽毛。宣子闻而借观之。

【原文】

楚子囊还自伐吴，卒。将死，遗言谓子庚：“必城